



Selasa, 23 Mei 2023

Ogen: Markus 15: 40,47



Ikut Seh Ku Kuburen Jesus



Kaka, agi, bapa nande. Si erkeleng ate e, teman pe ras kade-kade, tadingkenna kita nge. Taruhkenna gia kita, seh ku bas kuburen e. Lawes ia me kerina, tadingkenna bangke e. Bageme si isuratken jadi ende-enden i bas kitab ende-enden No. 98:2. Terjeng bage nge ngenca banci ilakoken ncidahken penggejapen kebenen ibas lawesna kekelengenta ibas kematenna. Deba labo sempat ka pe ia naruhkan maitna seh ku kuburen, ngulihisa ntah pe naruhkan bungana. Bageme paksa kematen Jesus, kebiaren ajar-ajar erbahan ia merap ras simaba ukur ras dalanna jine. Labo piga si pang ngakui ia teman ntah pe ngikut Jesus erkiteken imam-imam ras guru agama si jadi imbangna, terancam denga akapna diri ras keamanenna. Tapi la bage siibahan piga-piga teman ras murid Jesus, amin labo kerina, lit piga-piga siisuratken gelarna, jadi saksi kerina kejadiin e. Salah sadana eme Maria Magdalena. Idahna ija Jesus ikuburken, amin ia ngikut-ngikutca idauh-dauh nari, labo pangsa kal ia natap ntah ngikutkenca ideher-deher nari. Bageme me Maria Magdalena tetap pang ngikutken Jesus, ibas paksa kiniseran ras kematen Jesus tetap ia jadi pengikut sisetia, seh ku kuburen Jesus iarak-arakna. Erkiteken seh ia ku kuburen Jesus me maka ietehna ija Jesus ikuburken bagepe ersikap ia nguna ndahisa alu maba erbage rempah-rempah ras minak.

Kesetian sekalak jelma teruji ibas paksa kiniseran ntah kesusahen. La piga kalak sibertahan sebage teman ibas kecibal sibage rupana. Bagi sienggo icidahken Maria Magdalena, min kita pe nggit ngusih kesetian sibage rupana, ibas ngikutken Jesus. Ibas kerina paksa icidahkenna kesetianna, amin lit tantangan ras kebiaren iadepenna. Mari tetap setia ngikutken Jesus, subuk ibas susah ntah pe senang.